



Pontanus honesto loco apud Saxones natus, & multis egregijs uirtutibus decoratus fuit. Is ab adolescentia liberalibus artibus & eloquentiæ operam dedit, & in ijs plurimum profecit. Inde animum ad Iuris studia conuertit, & tantum legum usum acquisiuit, ut suo tempore doctissimis Iureconsultis compararetur. Accedebat ei pietatis studium, innocentia uitæ, & naturalis facundia, cum adiuncta prudentia. Id cū elector Saxonix cognosceret, eum ad suam curiam recepit, & inter consiliarios adesse iussit. Huius uiri opera Saxonix duces duces in rebus grauissimis sæpius usi fuerunt. Nam res feliciter expedire, & ubiq; saluam existimationem conseruare solebat. Vnde etiam 1530 in magnis Augustanis comitijs Ioanni electori adfuit, atq; ipsius & sociorum nomine ad Cæsaris decretū magno animo respondit. Pari ratione 1535, in Smalkaldico cōuentu, regis Gallix legato atq; reliquis proceribus rationem foederis suorum principū exposuit, & multa cum ijs de uera religione contulit. Tandem etiam 1544 Spiræ Iohannem Fridericum Saxonix electorem cum rege Ferdinando pro sua prudentia reconciliauit, atq; res alias suæ fidei concreditas expediuit. Hac eius dexteritate factum, ut cunctis principibus innotesceret, & in magna passim autoritate esset. Ioan. Sleid,